

ՀԱՅԿԱԿԱՆ ՍՍՀ ԳԻՏՈՒԹՅՈՒՆՆԵՐԻ ԱԿԱԳԵՄԻԱՅԻ ՏԱՐԵԿԱՆ
ԸՆԴՀԱՆՈՒՐ ԺՈՂՈՎՐ

Ապրիլի 29-ին տեղի ունեցավ Հայկական ՍՍՀ գիտությունների ակադեմիայի տարեկան ընդհանուր ժողովը, որը քննարկեց ՀՍՍՀ ԳԱ հետագա աշխատանքային գործունեությունը ՍՄԿԿ XXVII համագումարի, ՍՄԿԿ Կենտկոմի հունվարյան պլենումի առաջադրած վերակառուցման խնդիրների լույսի ներքո: Բացման խոսքով հանդես եկավ Հայկական ՍՍՀ ԳԱ պրեզիդենտ Վ. Հ. Համբարձումյանը: Նա մասնավորապես կանգ առավ կուսակցության ընդունած մի շարք կարևոր որոշումների վրա, որոնք նոր պահանջներ են դնում ինչպես հիմնարար, այնպես էլ կիրառական գիտությունների առջև: Ընդ որում նշվեց, որ հիմնարար գիտությունների վերելքը ապահովելու միջոցները նույնն են, ինչ որ մեր հասարակության կյանքի մյուս բոլոր ոլորտներում՝ աշխատանքի վերակառուցում և ինտենսիֆիկացում: Խոսվեց այն հիմնական դժվարությունների մասին, որ կան կազմակերպչական, հաստիքային, կառուցվածքային և տեխնիկական վերակառուցման ճանապարհին: Վ. Հ. Համբարձումյանը նշեց այն երեք միջոցառումները (գիտության արդյունքների հրապարակում, գերատեսչական գիտության հետ համագործակցություն և ակադեմիայի ինստիտուտներին կից հատուկ կոնստրուկտորական բյուրոների ու փորձնական գործարանների ստեղծում), որոնց հետագա զարգացումը հանգեցնելու է վերակառուցման կարևոր նպատակներից մեկին՝ արտադրության վրա ակադեմիական գիտության ազդեցության ուժեղացմանը: Այս կապակցությամբ բոլոր բաժանմունքների ուշադրությունը հրավիրվեց այն թույլ կապերի վրա, որ կան ակադեմիայի ինստիտուտների և արդյունաբերական հիմնարկների միջև:

«Հայկական ՍՍՀ ԳԱ գիտական և կազմակերպական գործունեության հիմնական արդյունքների մասին» թեմայով զեկուցումով հանդես եկավ Հայաստանի գիտությունների ակադեմիայի ակադեմիկոս քարտուղար Գ. Սեդրակյանը: Զեկուցման մեջ նշվեցին հաշվետու տարում ԳԱ գործունեության հիմնական ուղղությունները, շոշափվեցին գիտական հետազոտությունների հետագա խորացման և ինտենսիֆիկացման, աշխատանքների արդյունավետության բարձրացման անհրաժեշտության հարցերը: Զեկուցողն ասաց, որ հասարակական գիտությունների բնա-

ստիչական վերակառուցումը կոչված է որակապես ամրապնդելու կյանքի հետ այդ գիտությունների կապը, ապահովելու դրանց անցումը էքսպոնենսիվ ուղուց դեպի ինտենսիվ ուղի: Պետք է կտրուկ բարձրանա հասարակական գիտությունների արդյունավետությունը, դրանց դերը սոցիալիստական հասարակության բոլոր կողմերի պլանաչափ կատարելագործման համար: Զեկուցման շուրջ ծավալված մտքերի փոխանակությանը մասնակցեցին ՀՍՍՀ ԳԱ ակադեմիկոսներ Մ. Տեր-Միքայելյանը, Գ. Սարգսյանը, Գ. Բրուտյանը, Բ. Առաքելյանը, Մ. Ներսիսյանը, Վ. Ղազարյանը, թղթակից անդամներ Ա. Բաղդասարյանը, Գ. Տեր-Ստեփանյանը:

Տարեկան ընդհանուր ժողովում կայացավ Հայկական ՍՍՀ գիտությունների ակադեմիայի պարգևների հանձնման ամենամյա հանդիսավոր արարողությունը: Բեղմնավոր գործունեության համար «Մեծարման գիր» ստացավ ակադեմիկոս Մ. Զրբաշյանը: Վաստակագրեր ստացան Հայկական ՍՍՀ ԳԱ թղթակից անդամներ Ս. Մովսիսյանը, Մ. Ինճիկյանը, Ա. Մկրտչյանը, գիտության դոկտորներ Մ. Զուլալյանը, Պ. Հակոբյանը, գիտության թեկնածուներ Ռ. Սարգսյանը և է. Ղուլյանը: Մի մեծ խումբ գիտական աշխատողների հանձնվեցին գովեստագրեր, պատվոգրեր:

Տարեկան ընդհանուր ժողովում գիտական հետազոտությունների նորագույն ուղղությունների մասին ելույթ ունեցան ԳԱ թղթակից անդամներ Վ. Խոջաբեկյանը, Ա. Քուլուկյանը, Վ. Դովլաթյանը:

Տարեկան ընդհանուր ժողովը հաստատեց Հայկական ՍՍՀ գիտությունների ակադեմիայի լենինականի գիտական կենտրոնի կանոնադրությունը:

Հայկական ՍՍՀ գիտությունների ակադեմիայի տարեկան ընդհանուր ժողովին մասնակցում էին Կ. Դեմիրճյանը, Ֆ. Սարգսյանը, Ռ. Արզումանյանը, կուսակցության ու կառավարության այլ ղեկավարներ:

Ապրիլի 27—28-ին տեղի ունեցան Հայկական ՍՍՀ գիտությունների ակադեմիայի բաժանմունքների տարեկան ընդհանուր ժողովները, ուր լրացվեցին հաշվետու զեկուցումներ և գիտական հազորդումներ:

Մ. Կ.